

孔子集語
二



2 121
1
:0504

60615

孔
子
集
語
二

孫星衍輯

中
華
書
局

孔子集語卷十

山東督糧道臣孫星衍撰

論政九

【尚書大傳】子曰。古之聽民者。察貧窮。哀孤獨。矜寡。宥老幼。不肖無告。有過必赦。小罪勿增。大罪勿累。老弱不受刑。有過不受罰。故老而受刑。謂之悖。弱而受刑。謂之剋。不赦有過。謂之賊。逆率過。以小謂之枳。故與其殺不辜。寧失有罪。與其增以有罪。本無以字。據御覽六百五十二引補。寧失過。以有赦。

【尚書大傳】孔子如衛。人謂曰。公甫不能聽訟。子曰。非公甫之不能聽獄也。公甫之聽獄也。有罪者懼。無罪者恥。民近禮矣。

【尚書大傳】子曰。聽訟。雖得其指。必哀矜之。死者不可復生。鑿者不可復續也。書曰。哀矜折獄。

【尚書大傳】子曰。吳越之俗。男女同川而浴。其刑重而不勝。由無禮也。中國之教。內外有分。男女不同櫛。枷不同巾櫛。其刑重而勝。由有禮也。語曰。夏后不殺不刑。罰有罪而民不輕犯。死罰二千鐸。末句。據史記平準書案隱引補。

【尚書大傳】子曰。今之聽民者。求所以殺之。古之聽民者。求所以生之。不得其所以生之之道。乃刑殺。君與臣會焉。聽民。漢書刑法志作聽獄。

【尚書大傳】孔子曰。古之刑者省之。今之刑者繁之。其教古者有禮。然後有刑。是以刑省也。今也反是。無禮而齊之以刑。是以繁也。書曰。伯夷降典禮。折民以刑。謂有禮然後有刑也。又曰。茲殷罰有倫。今也反是。諸侯不同聽。每君異法。聽無有倫。是故法之難也。

【後漢五行志注引尚書大傳鄭注】孔子說春秋曰。政以不由王出。不得爲政。則王君出政之號也。

【韓詩外傳二】高牆豐上激下。未必崩也。降雨興。流潦至。則崩必先矣。草木根莖淺。未必擗也。飄風興。暴雨墜。則擗必先矣。君子居是邦也。不崇仁義。尊賢臣。以理萬物。未必亡也。一旦有非常之變。諸侯交爭。人趨車馳。迫然禍至。乃始憂愁。乾喉焦脣。仰天而歎。庶幾乎望其安也。不亦晚乎。孔子曰。不慎其前。而悔其後。嗟乎。雖悔無及矣。

【說苑建本】豐牆墮下。未必崩也。流行潦至。壞必先矣。樹木淺根。垓不深。未必擗也。飄風起。暴雨至。拔必先矣。君子居於是國。不崇仁義。不尊賢臣。未必亡也。然一旦有非常之變。車馳人走。指而禍至。乃始乾喉焦脣。仰天而嘆。庶幾焉天其救之。不亦難乎。孔子曰。不慎其前。而悔其後。雖悔無及矣。

【韓詩外傳二】傳曰。孔子云。美哉顏無父之御也。馬知後有與而輕之。知上有人而愛之。馬親其正而敬其事。如使馬能言。彼將必曰。樂哉。今日之騶也。至於顏淪。少衰矣。馬知後有與而輕之。知上有人而敬之。馬親其正而敬其事。如使馬能言。彼將必曰。騶來。其人之使我也。至於顏夷而衰焉。馬知後有與而重之。知上有人而畏之。馬親其正而畏其事。如使馬能言。彼將必曰。騶來。騶來。女不騶。彼將殺女。故御馬有法。

矣。御民有道矣。法得則馬和而歡。道得則民安而集。詩曰：執轡如組，兩驂如舞。此之謂也。

【韓詩外傳三】傳曰：宋大水，魯人弔之曰：天降淫雨，害於桑盛，延及君地，以憂執政，使臣敬弔。宋人應之曰：寡人不仁，齋戒不修，使民不時，天加以災，又遣君憂，拜命之辱。孔子聞之曰：宋國其庶幾矣。弟子曰：何謂？孔子曰：昔桀紂不任其過，其亡也忽焉。成湯文王知任其過，其興也勃焉。過而改之，是不過也。宋人聞之，乃夙興夜寐，弔死問疾，戮力宇內，三歲年豐政平。

【韓詩外傳六】子路治蒲三年，孔子過之，人境而善之，曰：由恭敬以信矣。人邑曰：善哉，由忠信以寬矣。至庭曰：善哉，由明察以斷矣。子貢執轡而問曰：夫子未見由，而三稱善，可得聞乎？孔子曰：人其境，田疇其易，此二字本脫。據文選籍田賦注引補。草萊其辟，此恭敬以信，故民盡力。人其邑，墻屋其尊，樹木其茂，此忠信以寬，其民不偷，入其庭甚閑，此明察以斷，故民不擾也。

【韓詩外傳八】子賤治單父，其民附。孔子曰：告丘之所以治之者，對曰：不齊時發倉廩，振困窮，補不足。孔子曰：是小人附耳，未也。對曰：賞有能，招賢才，退不肖。孔子曰：是士附耳，未也。對曰：所父事者三人，所兄事者五人，所友者十有二人，所師者一人。孔子曰：所父事者三人，據說苑脫一句。所兄事者五人，足以教弟矣。所友者十有二人，足以祛壅蔽矣。所師者一人，足以虛無失策，舉無敗功矣。惜乎，不齊爲之大功，乃與堯舜參矣。

【說苑政理】孔子謂宓子賤曰：子治單父而衆說，語丘所以爲之者，曰：不齊父其父，子其子，恤諸孤而

哀喪紀。孔子曰：善小節也。小民附矣，猶未足也。曰：不齊也。所父事者三人，所兄事者五人，所友者十一人。孔子曰：父事三人，可以教孝矣；兄事五人，可以教弟矣；友十一人，可以教學矣。中節也。中民附矣，猶未足也。曰：此地民有賢於不齊者五人，不齊事之，皆教不齊所以治之術。孔子曰：欲其大者，乃於此在矣。昔者堯舜，清微其身，以聽觀天下，務來賢人，夫舉賢者，百福之宗也，而神明之主也。不齊之所治者小也，不齊所治者大，其與堯舜繼矣。

【大戴禮子張問入官】子張問入官於孔子。孔子曰：安身取譽爲難也。子張曰：安身取譽如何？孔子曰：有善勿專，教不能勿措，已過勿發，失言勿踣，不善辭勿遂，行事勿留。君子入官，自行此六路者，則身安譽至而政從矣。且夫忿數者，獄之所由生也；距諫者，慮之所以塞也；慢易者，禮之所以失也；墮怠者，時之所以後也。奢侈者，財之所以不足也；專者，事之所以不成也；歷者，獄之所由生也。君子入官，除七路者，則身安譽至而政從矣。故君子南面臨官，大城而公治之，精知而略行之，合是忠信，考是大倫，存是美惡，而進是利，而除是害，而無求其報焉，而民情可得也。故臨之無抗民之志，勝之無犯民之言，量之無狡民之辭，養之無擾於時，愛之勿寬於刑。言一作苦。此則身安譽至而民自得也。故君子南面臨官，所見邇，故明不可弊也；所求邇，故不勞而得也。所以治者約，故不用衆而譽至也。法象在內，故不遠源泉不竭。故天下積也，而木不寡短長，人得其量，故治而不亂。故六者貫乎心，藏乎志，形乎色，發乎聲。若此，則身安而譽至，而民自得也。故君子南面臨官，不治則亂，至亂至鬪，爭之至，又反於亂，是故事裕以容其民，慈愛以優柔之。

而民自得也已。故躬行者。政之始也。調悅者。情之道也。善政行易。則民不怨言。調悅則民不辨法。仁在身則民顯以佚之也。財利之生微矣。貪以不得。善政必簡矣。苟以亂之。善言必聽矣。詳以失之。規諫日至。煩以不聽矣。言之善者。在所日聞。行之善者。在所能爲。故上者。民之儀也。有司執政。民之表也。邇臣便辟者。羣臣僕之倫也。故僕不正。則民失誓。表弊則百姓亂。邇臣便辟不正。廉而羣臣服汗矣。故不可不慎乎三倫矣。故君子脩身。反道察說。而邇道之服存焉。是故夫工女必自擇絲麻。良工必自擇齋材。賢君良上必自擇左右始。故佚諸取人。勞於治事。勞於取人。佚於治事。故君子欲譽。則謹其所便。欲名。則謹於左右。故上者。辟如緣木者。務高而畏下者。滋甚。六馬之離。必於四面之衢。民之離道。必於上之佚政也。故上者尊嚴而絕。百姓者卑賤而神。民而愛之。則存。惡之。則亡也。故君子南面臨官。貴而不驕。富恭有本能。圖脩業居久而譚。情邇暢而及乎遠。察一而關于多。一物治而萬物不亂者。以身爲本者也。故君子莅民。不可以不知民之性。達諸民之情。既知其以生有習。然後民特從命也。故世舉則民親之。政均則民無怨。故君子莅民。不臨以高。不道以遠。不責民之所不能。今臨之明王之成功。則民嚴而不迎也。道以數年之業。則民疾。疾則辟矣。故古者冕而前旒。所以蔽明也。統元本作紱。玉篇引作紱。說文。統。冕冠塞耳者。則統。卽統之誤。統塞耳。所以弇聰也。故水至清則無魚。人至察則無徒。故枉而直之。使自得之。優而柔之。使自求之。揆而度之。使自索之。民有小罪。必以其善以赦其過。如死使之生。其善也。是以上下親而不離。故惠者。政之始也。政不正。則不可教也。不習。則民不可使也。故君子欲言之見信也者。莫若先虛其內也。欲政之速行也者。

莫若以身先之也。欲民之速服也者，莫若以道御之也。故不先以身，雖行必鄰矣。不以道御之，雖服必強矣。故非忠信，則無可以取親於百姓矣。外內不相應，則無可以取信者矣。四者，治民之統也。

【大戴禮千乘】公曰：千乘之國，受命於天子，通其四疆，教其書社，循其灌廟，建其宗主，設其四佐，列其五官，處其朝市，爲仁如何？子曰：不仁，國不化。公曰：何如之謂仁？子曰：不淫於色。子曰：立妃設如太廟然，乃中治，中治不相陵，不相陵，斯庶殯遠遼，則事上靜，靜斯潔信在中，朝大夫必慎以恭，出會謀事必敬以慎，言長幼小大必中度，此國家之所以崇也。立子設如一本無如字。宗社，宗社先示威，威明顯見，辨爵集德，是以母弟官子咸有臣志，莫敢援於外。大夫中婦私謁不行，此所以使五官治執事政也。夫政以教百姓，百姓齊以嘉善，故蠱侯不生，此之謂良民。國有道則民昌，此國家之所以大遂也。卿設如大門，大門顯美，小大尊卑中度，開明閉幽，內祿出災，以順天道。近者閑焉，遠者稽焉，君發禁，宰大訓，此下有受字。而行之以時，通于地，散布于小，理天之災祥，地寶豐省，及民其饗其祿，共任其災，此國家之所以和也。國有四輔，輔，卿也。卿設如四體，毋易事，毋假名，毋重食，凡事尚賢進能，使知事，爵不世，能大訓，此下有官字。之不愆，凡民戴名以能，食力以時成，以事立，此所以使民讓也。民咸孝弟而安讓，此以怨省而亂不作也。此國之所以長也。下無用，則國家富。上有義，則國家治。長有禮，則民不爭。立有神，則國家敬。兼而愛之，則民無怨心，以爲無命，則民不偷。昔者先王立此六者，而樹之德，此國家之一本無之字。所以茂也。設其四佐而官之，司徒典春，以教民之不則，時不若不令，成長幼老疾孤寡，以時通于四壘，有闔而不通，有煩而不治，則民不樂生，不

利衣食。凡民之藏貯以及山川之神明加于民者。發圖一作國功謀。齋戒必敬。會時必節。日歷巫祝。執伎以守官。俟命而作。祈王年。禱民命及畜穀。蜚征。庶虞草。方春三月。緩施生育。動作百物。於時有事。享于皇祖。皇考。朝孤子八人。以成春事。司馬司夏。以教士車甲。凡士執伎論功。修四衛。強股肱。質射御。才武聰慧。治衆長卒。所大訓作。可以爲儀。綴於國。出可以爲率。誘於軍旅。四方諸侯之遊士。國中賢餘秀興閱焉。方夏三月。養長秀。蕃庶物。於時有事。享于皇祖。皇考。爵士之有慶者七人。以成夏事。司寇司秋。以聽獄訟。治民之煩亂。執權變民中。凡民之不刑。崩本以要閒。作起不敬。以欺惑僮愚。作於財賄。六畜五穀曰盜。誘居室家有君子曰義。子女專曰嫒。飭五兵及木石曰賊。以中情出。小曰閒。大曰講。利辭以亂屬曰讒。以財投長曰貸。凡犯天子之禁。陳刑制辟。以追國民之不率上教者。闕大訓作國夫是故一家三夫道行。三人飲食。哀樂平。無獄。方秋三月。收斂以時。於時有事。嘗新于皇祖。皇考。食農夫九人。以成秋事。司空司冬。以制度制地事。準揆山林。規表衍沃。蓄水行衰。御覽作表。濯御覽作澹。浸以節四時之事。治地遠近。以任民力。以節民食。太古食壯之食。攻老之事。公曰。功事不少。而餼糧不多乎。子曰。太古之民。秀長以壽者。食也。在今之民。羸醜以齒者。事也。大古無游民。食節事時。民各安其居。樂其宮室。宮室二字。大訓作官。服事信上。上下交信。地移民在今之世上。治不平。民治不和。百姓不安其居。不樂其宮。大訓作官。老疾用財。壯狡用力。於茲民游。薄事貪食。於茲民憂。古者殷書。爲成男。成女名屬。升于公門。此以氣食得節。作事得時。勸有功。夏服君事不及喝。冬服君事不及凍。是故年穀不成。天之飢饉。道無殪者。在今之世。男女屬散。名不升于公門。此以氣食

不節。作事不成。大訓作時。天之飢饉。於時委民。不得以疾死。是故立民之居。必于中國之休地。因寒暑之和。六畜育焉。五穀宜焉。辨輕重。制剛柔。和五味。以節食時事。東辟之民曰夷。精以饒。至于大遠。有不火食者矣。南辟之民曰蠻。信以朴。至于大遠。有不火食者矣。西辟之民曰戎。勁以剛。至于大遠。有不火食者矣。北辟之民曰狄。肥以戾。至于大遠。有不火食者矣。及中國之民曰五方之民。有大訓上有威字。安民大訓作居。和味。咸有實用利器。知通之。信令之。及量地度居。邑有城郭。立朝市。地以度邑。以度民。以觀安危。距封後利。先慮久固。依固可守。爲與可久。能節四時之事。霜露時降。方冬三月。草木落。庶虞藏。五穀必蓄于倉。於時有事。蒸于皇祖。皇考。息國老六人。以成冬事。民咸知孤寡之必不失也。咸知有大功之必進等也。咸知用勞力之必以時息也。推而內之水火。人也弗之顧矣。而況有強適在前。有君長正之者乎。公曰。善哉。

【大戴禮四代】公曰。四代之政刑。論其明者。可以爲法乎。子曰。何哉。四代之政刑。皆可法也。公曰。以我行。之。其可乎。子曰。否。不可。臣願君之立知。而以觀聞也。四代之政刑。君若用之。則緩急將有所不節。不節。君將約之。約之。卒將棄法。棄法。是無以爲國家也。公曰。巧匠輔繩而斲。胡爲其棄法也。子曰。心未之度。習未之狎。此以數踰而棄法也。夫規矩準繩鈎衡。此昔者先王之所以爲天下也。小以及大。近以知遠。今日行之。可以知古。可以察今。其此邪。水火金木土穀。此謂六府。廢一不可。進二不可。民竝用之。今日行之。可以知古。可以察今。其此邪。昔夏商之未興也。伯夷謂此二帝之眇。公曰。長國治民。恒幹論政之大體。以教民。辨。歷大道以時地性。與民之陽德。以教民事。上服周室之典。以順事天子。脩政勤禮。以交諸侯。大節無廢。

小眇其後乎。子曰：否，不可後也。詩云：東有開明，於時鸛三號，以興庶虞。庶虞動，蜚征作，嚮民執功，百草咸淖，地傾水流之。是以天子盛服，朝日于東堂，以教敬，示威于天下也。是以祭祀，昭有神明，燕食，昭有慈愛。宗廟之事，昭有義，率禮朝廷，昭有五官，無廢甲冑之戒。昭果毅以聽，天子曰：崩，諸侯曰：薨，大夫曰：卒，士曰：不祿。庶人曰：死。昭哀，哀愛無失節，是以父慈子孝，兄愛弟敬。此昔先王之所先施於民也。君而後此，則爲國家失本矣。公曰：善哉！子察教我也。子曰：鄉也，君之言善，執國之節也。君先眇而後善，中備以君子言，可以知古，可以察今，矣然而與民壹始。公曰：是非吾言也。吾一聞於師也。子吁焉，其色曰：嘻！君行道矣。公曰：道邪？子曰：道也。公曰：吾未能知人，未能取人。子曰：君何爲不觀器視才？公曰：視可明乎？子曰：可以表儀。公曰：願學之。子曰：平原大藪，瞻其草之高豐茂者，必有怪鳥獸居之。且草可財也，如艾而夷之，其地必宜五穀。高山多林，必有怪虎豹蕃孕焉。深淵大川，必有蛟龍焉。民亦如之。君察之，可以見器見才矣。公曰：吾猶未也。子曰：羣然，威大訓作威，然，頤然，舉然，蹀然，柱然，抽然，首然，僉然，湛然，淵淵然，淑淑然，齊齊然，節節然，穆穆然，皇皇然，見才色脩聲不視聞，怪物恪命不改志，舌不更氣，君見之舉也，得之取也，有事事也，事必與食，食必與位，無相越踰。昔虞舜天德嗣堯，取相十有六人如此。公曰：嘻！美哉！子道廣矣。曰：由德徑徑，吾恐憊而不能用也。何以哉？公曰：請問圖德何尚？子曰：聖知之華也，知仁之實也，仁信之器也，信義之重也，義利之本也，委利生孽。公曰：嘻！言之至也。道天地以民輔之，聖人何尚？子曰：有常德，有地德，有人德，此謂三德。三德率行，乃有陰陽。陽曰德，陰曰刑。公曰：善哉！再聞此矣。陽德何出？子曰：陽德出禮，禮出刑，刑出慮，慮

則節事於近而揚聲於遠。公曰：善哉！載事何以？子曰：德以監位，位以充局，局以觀功，功以養民。民於此乎上。公曰：祿不可後乎？子曰：食爲味，味爲氣，氣爲志，發志爲言，發言定名，名以出信，信載義而行之。祿不可後也。公曰：所謂民與天地相參者，何謂也？子曰：天道以視，地道以履，人道以稽。廢一日失統，恐不長饗國。公愀然其色。子曰：君藏玉，惟慎用之，雖慎敬而勿愛，民亦如之。執事無貳，五官有差，喜無竝愛，卑無加尊，淺無測深，小無招大。此謂相機。相機寶焉不蒙，昔舜徵薦此道於堯，堯親用之，不亂上下。公曰：請問民微。子曰：無以爲也。難行，公曰：願學之。幾必能。子曰：貪於味不讓，妨於政。願富不久，妨於政。慕寵假貴，妨於政。治惡衆，妨於政。爲父不慈，妨於政。爲子不孝，妨於政。大縱耳目，妨於政。好色失志，妨於政。好見小利，妨於政。變從無節，撓弱不立，妨於政。剛毅犯神，妨於政。鬼神過節，妨於政。幼勿與衆，克勿與比，伏勿與謀，放勿與游，微勿與事。臣聞之弗慶。大訓作弗非事君也。君聞之弗用，以亂厥德。臣將慶。大訓作薦其簡者，蓋人有可知者焉。貌色聲衆有美焉，必有美質在其中者矣。貌色聲衆有惡焉，必有惡質在其中者矣。此者，伯夷之賢後出也。子曰：伯夷建國建政，脩一作循國脩政。公曰：善哉。

【大戴禮小辯】公曰：寡人欲學小辯，以觀於政，其可乎？子曰：否，不可。社稷之主愛日，日不可得，學不可以辯。是故昔者先王學齊大道，以觀於政。天子學樂辯風，制禮以行政。諸侯學禮辯官政，以行事。以尊事天子。大夫學德別義，矜行以事君。士學順辯言以遂志。庶人聽長辯禁，農以行力。如此猶恐不濟，奈何其小辯乎？公曰：不辯則何以爲政？子曰：辯而不小，失小辯被言，小言被義，小義破道，道小不通，通道必簡，是故

循弦以觀於樂。足以辯風矣。爾雅以觀於古。足以辯言矣。傳言以象。反舌皆至。可謂簡矣。夫道不簡則不行。不行則不樂。夫亦固十稭之變。由不可既也。而況天下之言乎。曰。微子之言。吾壹樂辯言。子曰。辯言之樂。不若治政之樂。辯言之樂不下席。治政之樂皇於四海。夫政善則民說。民說則歸之如流水。親之如父母。諸侯初人而後臣之。安用辯言。公曰。然則吾何學而可。子曰。此下大訓有行字。禮樂而力。忠信其君。其習可乎。公曰。多與我言忠信。而不可以入患。子曰。毋乃既明忠信之備。而口倦其君。則不可而有明忠信之備。而又能行之。則可立待也。君朝而行忠信。百官承事。忠滿於中而發於外。刑於民而放於四海。天下其孰能患之。公曰。請學忠信之備。子曰。唯社稷之主。實知忠信。若丘也。綴學之徒。安知忠信。公曰。非吾子問之而焉也。子三辭。將對。公曰。彊避。子曰。彊侍。丘聞大道不隱。丘言之。君發之於朝。行之於國。一國之人莫不知。何一之彊辟。丘聞之。忠有九知。知忠必知中。知中必知恕。知恕必知外。知外必知德。知德必知政。知政必知官。知官必知事。知事必知患。知患必知備。若動而無備。患而弗知。死亡而弗知。安與知忠信。內思畢必戴校作心。曰。知中。中以應實。曰。知恕。內恕外度。曰。知外。外內參意。曰。知德。德以柔政。曰。知政。正義辯方。曰。知官。官治物。則曰。知事。事戒不虞。曰。知備。毋患曰。樂。樂義曰。終。

【淮南子泰族訓】孔子曰。小辯破言。小利破義。小藝破道。小見不達。達必簡。一本達字不重。一木作大體必簡。河以透蛇故能遠。山以陵遲故能高。陰陽無爲故能和。道以優柔故能化。

【魯語下】季康子欲以田賦。使冉有訪諸仲尼。仲尼不對。私於冉有曰。求來。女不聞乎。先王制土。籍田以

力而砥其遠邇。賦里以人而量其有無。任力以夫而議其老幼。於是乎有鰥寡孤疾。有軍旅之出則徵之。無則已。其歲收田一井。出稷禾秉芻缶米。不是過也。先王以爲足。若子季孫欲其法也。則有周公之籍矣。若犯法。則苟而賦。又何訪焉。

【春秋縣露王道】臧孫辰請糴于齊。孔子曰。君子爲國。必有三年之積。一年不孰。乃請糴。失君之職也。

【春秋縣露身之養重於義】仲尼曰。國有道。雖加刑也無刑。國無道。雖殺之不可勝也。

【白虎通三教引樂稽燿嘉】顏回尚當作問三教變虞夏何如。曰。教者。所以追捕敗政。靡弊澗濁。謂之治

也。舜之承堯。無爲易也。

【漢書刑法志】孔子曰。古之知法者。能省刑。本也。今之知法者。不失有罪。末矣。又曰。今之聽獄者。求所目殺之。古之聽獄者。求所以生之。案今之聽獄四句。卽前尚書大傳文。

【晏子春秋問上】景公問于晏子曰。爲政何患。晏子對曰。患善惡之不分。公曰。何以察之。對曰。審擇左右。左右善。則百僚各得其所宜而善惡分。孔子聞之曰。此言也信矣。善進。則不善無由入矣。不善進。則善無由入矣。

【說苑政理】齊侯問於晏子曰。爲政何患。對曰。患善惡之不分。公曰。何以察之。對曰。審擇左右。左右善。則百僚各得其所宜而善惡分。孔子聞之曰。此言也信矣。善言進。則不善無由入矣。不善言。則善無由入矣。

【荀子正論】孔子曰：天下有道，盜其先變乎。

【荀子宥坐】孔子爲魯司寇，有父子訟者。孔子拘之，三月不別。其父請止，孔子舍之。季孫聞之不悅，曰：是老也欺予。語予曰：爲國家必以孝。今殺一人以戮不孝，又舍之，冉子以告。孔子慨然歎曰：嗚呼！上失之下，殺之，其可乎？不教其民而聽其獄，殺不辜也。三軍大敗，不可斬也。獄犴不治，不可刑也。罪不在民故也。嬖令謹誅賊也，令有時，斂也；無時，暴也。不教而責成功，虐也。已此三者，然後刑可卽也。書曰：義刑義殺，勿庸以卽。予維曰：未有順事，言先教也。故先王既陳之以道，上先服之，若不可，尚賢以綦之，若不可，廢不能以單之，綦三年而百姓往矣。邪民不從，然後俟之以刑，則民知罪矣。詩曰：尹氏大師，維周之氏，秉國之均，四方是維。天子是庠，卑民不迷，是以威厲而不試，刑錯而不用，此之謂也。今之世則不然，亂其教，繁其刑，其民迷惑而陷焉。陷或作墮則從而制之，是以刑彌繁而邪不勝。三尺之岸而虛車不能登也，百仞之山任負登車焉，何則？陵遲故也。數仞之牆而民不踰也，百仞之山而豎子馮而游焉，陵遲故也。今夫世之陵遲亦久矣，而能使民勿踰乎？詩曰：周道如砥，其直如矢。君子所履，小人所視，眷焉顧之，潸然出涕，豈不哀哉？詩曰：瞻彼日月，悠悠我思，道之云遠，曷云能來？子曰：伊稽首不其有來乎。

【韓詩外傳三】傳曰：魯有父子訟者，康子次殺之。孔子曰：未可殺也。夫民父子訟之，爲不義久矣，是則上失其道，上有道，是入亡矣。訟者聞之，請無訟。康子曰：治民以孝，殺一不義以僂不孝，不亦可乎？孔子曰：否。不教而聽其獄，殺不辜也。三軍大敗，不可誅也。獄讞不治，不可刑也。上陳之教而先服之，則百姓

從風矣。邪行不從。然後俟之以刑。則民知罪矣。夫一仞之牆。民不能踰。百仞之山。童子登遊焉。陵遲故也。今其仁義之陵遲久矣。能謂民無踰乎。詩曰。俾民不迷。昔之君子。道其百姓。不使迷。是以威厲而刑措不用也。故形本或作刑。其仁義謹其教道。使民目晰焉而見之。使民耳晰焉而聞之。使民心晰焉而知之。則道不迷而民志不惑矣。詩曰。示我顯德行。故道義不易。民不由也。禮樂不明。民不見也。詩曰。周道如砥。其直如矢。言其易也。君子所履。小人所視。言其明也。瞽言顧之。潛焉出涕。哀其不聞禮教而就刑誅也。夫散其本教而待之刑辟。猶決其牢而發以毒矢也。亦不哀乎。故曰。未可殺也。昔者先王使民以禮。譬之如御也。刑者鞭策也。今猶無轡銜而鞭策以御也。欲馬之進。則策其後。欲馬之退。則策其前。御者以勞而馬亦多傷矣。今猶此也。上憂勞而民多罹刑。詩曰。人而無禮。胡不遄死。爲上無禮。則不免乎患。爲下無禮。則不免乎刑。上下無禮。胡不遄死。康子避席再拜曰。僕雖不敏。請承此語矣。孔子退朝。門人子路難曰。父子訟。道邪。孔子曰。非也。子路曰。然則夫子胡爲君子而免之也。孔子曰。不戒責成。害也。慢令致期。暴也不教而誅。賊也。君子爲政。避此三者。且詩曰。載色載笑。匪怒伊教。

【說苑政理】魯有父子訟者。康子曰。殺之。孔子曰。未可殺也。夫民不知子父訟之不善者久矣。是則上過也。上有道。是人亡矣。康子曰。夫治民以孝爲本。今殺一人以戮不孝。不亦可乎。孔子曰。不孝而誅之。薛據集語引作不孝者。不教而誅之。是虐殺不辜也。三軍大敗。不可誅也。獄訟不治。不可刑也。上陳之教而先服之。則百姓從風矣。躬行不從。而后俟之以刑。則民知罪矣。夫一仞之牆。民不能踰。百仞之山。童子升

而遊焉。陵遲故也。今是仁義之陵遲久矣。能謂民弗踰乎。詩曰。俾民不迷。昔者君子導其百姓不使迷。是以威厲而不至。刑錯而不用也。於是訟者聞之。乃請無訟。

【長短經政體】孔子曰。上失其道而殺其下。非禮也。故三軍大敗不可斬。獄犴不知不可刑。何也。上教之不行。罪不在人故也。夫慢令謹誅。賊也。徵斂無時。暴也。不誠責成。虐也。政無此三者。然後刑即可也。陳道德以先服之。猶不可。則尚賢以勸之。又不可。則廢不能以憚之。而猶有邪人不從化者。然後待之以刑矣。

【御覽六百三十三引慎子】孔子云。有虞氏不賞不罰。夏后氏賞而不罰。殷人罰而不賞。周人罰且賞。罰禁也。賞使也。

【羣書治要尸子發蒙】孔子曰。臨事而懼。希不濟。

【韓非子內儲說上七術】魯人燒積澤。天北風。火南倚。恐燒國。哀公懼。自將衆輒救火者。左右無人。盡逐獸而火不救。乃召問仲尼。仲尼曰。夫逐獸者樂而無罰。救火者苦而無賞。此火之所以無救也。哀公曰。善。仲尼曰。事急不及以賞。救火者盡賞之。則國不足以賞於人。請徒行賞。藝文類聚八十引作請從行罰。哀公曰。善。於是仲尼乃下令曰。不救火者比降北之罪。逐獸者比入禁之罪。令下未遍。而火已救矣。

【韓非子外儲說左下】孔子相衛。弟子子臯爲獄吏。別人足。所刑者守門。人有惡孔子於衛君者曰。尼欲作亂。衛君欲執孔子。孔子走。弟子皆逃。子臯從出門。踰危引之而逃之門下室中。吏追不得。夜半。子臯問